



30. Septembari 2025

UKA2025/28

Forslag til Inatsisartutlov om ændring af Landstingslov om efterskoler og udvekslingsophold

(Naalakkersuisoq for Uddannelse, Kultur, Idræt og Kirke)

Siullermik Naalakkersuisut imaattumik qaqitsinissinnut qujanaq. Imaattumillu Siumumiit oqaaseqassalluta.

Siunnersuutip tunngaviatigut Savalimmiuni efterskolernermut aamma Danmarkimi fagskolini namminersortuniinnermut tapiissuteqarsinnaanerit inatsisitigut tunngaviinik pilersitsinissaq Siumumiit ilalerparput taperserlugulu.

Inatsit UPA2024-mi imm. 159 aalajangerneqartumut malitsigineqarpoq, Nunat Avannarliit Killiit Siunnersuisooqatigiiffiata kaammattuutit aalajangersagaanik, ilaliinissamik kaammattuutaavoq. Taamaattumik siunnersuut tamakkiisumik ilalerlugulu taperserparput.

Nunatsinni efterskolit qanoq ineriartorsimanerat qiviaraanni, aningaasalersorneqarnerat artukkiiartortoq maluginiagassaavoq. Atuisunut angalaneq akisuvoq, taamaammallu pingaartumik isorliunerusuni inuusuttut najugaqartut, efterskolernissaminut angummatsitsiuminaatsitaqartut qularnanngilaq.

Ukiup ingerlanerani efterskolertut akornanni juullikkunni angerlarallartartut eqqarsaatigalugit, arlalippassuit efterskolimut uteqqinneq ajorput. Qularnanngitsumik tamanna aamma angalanerup akisunerujussuanik pissuteqarsimassasoq ilimanarpoq. Siumut isumaqarpoq, immikkut isiginnilluni aaqqiissuteqarniarnissaq tamatsinnut pisussaaffiusoq, inuusuttut amerlanerpaartaat periarfissaqarluartinniarlugit.

Ilanngullugu anguniarneqaqqunarpoq, Nunani Avannarlernit inuusuttut Nunatsinnut efterskoleriarsinnaanerisa ineriartortinneqarnissaa, tassami nunat tamalaat akornanni inuusuttut naapeqatigiillutik peqatigiinnissaat pingaaruteqartorujussuusoq Siumut isumaqarpoq. Tamanna nunat pineqartut oqaloqatiginerisigut suleqatiginerusigullu aqqutissiuunneqarsinnaasoq Siumut isumaqarportaaq.

Siumut isumaqarpoq siunnersuummut tunngatillugu tunngaviusumik oqaloqatigiissutissaqartugut, taamaammallu siunnersuut Kultureqarnermut, Ilinniartitaanermut Ilisimatusarnermut Ilageeqarnermullu Ataatsimiititaliamut ingerlateqqinneqassasoq innersuussutigaarput.



Lars Poulsen
Siumut